

## Peguam kuarantin kendiri, bicara kes 1MDB Najib ditangguh 17 Ogos

**KUALA LUMPUR** - Perbicaraan kes Datuk Seri Najib Tun Razak membabitkan dana 1Malaysia Development Berhad (1MDB), yang dijadualkan bersambung hari ini, telah dilapangkan setelah peguamnya Tan Sri Muhammad Shafee Abdullah menjalani kuarantin kendiri kerana menjadi kontak rapat pesakit Covid-19 minggu lepas.

Peguam Rahmat Hazlan yang turut mewakili bekas Perdana Menteri itu, memaklumkan bahawa perbicaraan di hadapan Hakim Collin Lawrence Sequerah ditangguh

sehingga 17 Ogos depan.

“Betul, Tan Sri (Shafee) sedang kuarantin kendiri kerana beliau ada kontak rapat dengan pesakit Covid-19,” katanya melalui aplikasi WhatsApp pada Rabu.

Timbalan Pendakwa Raya Ahmad Akram Gharib ketika dihubungi turut mengesahkan penangguhan perbicaraan itu.

Kes itu ditetapkan untuk sambung bincara sejak 29 Jun lepas namun telah ditangguhkan. Kali terakhir perbicaraan kes 1MDB didengar adalah pada 27 Mei.

Seorang lagi peguam Najib, Wan Aizuddin Wan Mohammed dijangka meneruskan pemeriksaan balas terhadap saksi pendakwaan ke-10 iaitu Mohd Hazem Abdul Rahman, 49, yang merupakan bekas Ketua Pegawai Eksekutif 1MDB apabila perbicaraan bersambung.

Najib berdepan empat pertuduhan iaitu menggunakan kedudukannya untuk memperoleh suapan berjumlah RM2.3 billion dana 1MDB dan 21 pertuduhan pengubahan wang haram. -Bernama